

論語 學而 1-9

► 文本及注音

子曰：「學而時習之，不亦說(yuè)乎？有朋自遠方來，不亦樂(lè)乎？人不知而不慍(yùn)，不亦君子乎？」

有子曰：「其為人也孝弟(tì)，而好犯上者，鮮(xiǎn)矣；不好犯上，而好作亂者，未之有也。君子務本，本立而道生。孝弟(tì)也者，其為仁之本與(yú)！」

子曰：「巧言令色，鮮(xiǎn)矣仁！」

曾子曰：「吾日三省(xǐng)吾身：為人謀而不忠乎？與朋友交而不信乎？傳(chuán)不習乎？」

子曰：「道千乘(shèng)之國：敬事而信，節用而愛人，使民以時。」

子曰：「弟(dì)子入則孝，出則弟(tì)，謹而信，汎(fàn)愛眾(zhòng)，而親仁。行有餘力，則以學文。」

子夏曰：「賢賢易色，事父母能竭其力，事君能致其身，與朋友交言而有信。雖曰未學，吾必謂之學矣。」

子曰：「君子不重則不威，學則不固。主忠信，無友不如己者，過則勿憚(dàn)改。」

曾子曰：「慎終追遠，民德歸厚矣。」